



Anna Wangenheim  
Inatsisartunut Ilaasortaq, Demokraatit

## Ado Lyngep Atuarfia pillugu § 37 naapertorlugu apeqqutip nr. 130/2022-p akineqarnera

Asasara Anna Wangenheim,

Inatsisartut suleriaasiat napertorlugu apeqquteqaatinnut qujanaq. Apeqqutigineqartut tullinnguuttuni akissuteqarfigineqassapput.

1. Ado Lyngep Atuarfia Aasianniittoq Naalakkersuisut siunissami qanoq pilersaaruteqarfigaat?

**Akissut:** Ado Lyngep Atuarfiata inatsisitigut tunngavianik aamma atuartunut angerlarsimaffittut aaqqissugaanerata allanngortinneqarnissaanut Naalakkersuisut maannakkut pilersaaruteqanngillat, maannakkullu eqqarsartariaatsimikkut ineriartormikkut piginnaasakitsut 14-init 20-nut ukiullit sulissunneqarput. 15-inik ukioqalerfimminni ukiumi atuartut atuartunngortinneqarsinnaanngortarput kingusinnerpaamillu ukiumi 20-nik ukioqalerfimminni atuarnertik naammassisinnaallugu. Sulissunneqartut allanngortinneqassappata imaluunniit annertuninngortinneqassappata atuartitsinikkut isumaginninnikkullu allat kikkut atuarsiup isumagissanerai imaluunniit sullisissanerai pisariaqartitsineq naapertorlugu misissuisoqqaartariaqarpoq.

- a. Aningaasaliissutit annertusinissaat annikillisinnaaluunniit pilersaarutigineqarpa?

**Akissut:** Ado Lyngep Atuarfianut aningaasaliissutinik ilanngaanissamik pilersaaruteqartoqanngilaq. Akerlianilli atuarfimmu aningaasaliissutit qanoq sutigullu maannakkut pisariaqartitanut atuarsiullu ineriartortitsinissamut kissaatigisaanut naleqqussarneqarsinnaanersut maannakkut Naalakkersuisut isumaliutigaa. Suliami matumani nunatsinni ulloq unnuarlu angerlarsimaffinnut aningaasaqarnikkut sinaakkutigineqartartut isiginiarneqarput.

- b. Aningaasaliissutit ilinniartitaanermut aqutsisoqarfimmiit isumaginninnermut aqutsisoqarfimmu nuunneqarnissaat pilersaarutigineqarpa? Akissut tunngavilersorneqarnissaa kissaatigaara.

**Akissut:** Meeqqanut, Inuusuttunut Ilaqutariinnullu Naalakkersuisoqarfiup ataaniittumut Isumaginninnermut Aqutsisoqarfimmu aningaasaliissutinut konto imaaliallaannarlugu nuutsinneqarsinnaanngilaq, tassami atuarfinnut najugaqarfiusunut immikkut aaqqissuussanut, matumani Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup

14-07-2022  
Sagsnr. 2022 - 14028  
Akt nr. 20575682

Postboks 1029  
3900 Nuuk  
Tlf: +299 34 50 00  
Email: [ikin@nаноq.gl](mailto:ikin@nаноq.gl)  
[www.nаноq.gl](http://www.nаноq.gl)

ataaniittumut Ado Lyngep Atuarfianut, atuarfik pillugu inatsit ilisimaneqartutut ingerlatsinermut inatsisitigut tunngavigineqarmat. Inatsisit atuuttut aamma akisussaaffinnik agguataarineq naapertorlugu Naalakkersuisoqarfimmut allamut nuussinermi suliffeqarfiup siunertaanik allannortitsinissaq pisariaqassaaq. Ado Lyngep Atuarfiata meeqqanut inuusuttunullu eqqarsartaatsimikkut ineriartornermikkut piginnaasakitsut atuarfittut siunertaqarneranik allannortitsinissaq Naalakkersuisut maannakkut pilersaarutiginnilaat. Taamatulli eqqarsartoqassappat atusut aamma kommunit minnerunngitsumillu pisortat aamma sulisut akornanni suleqatigiilluarnissaq aamma oqaloqatigiilluarnissaq pisariaqassaaq inuiaqatigiinni isumaginninnermi aamma atuartitsinermi suliffeqarfiup allannortinneqartup suut isumagissanerai pillugit.

2. Sooq atuarfimiit ukiumoortumik nalunaaruteqartannginnerat Naalakkersuisunit nassuiarneqarsinnaanerluni?

**Akissut:** Ukiumoortumik nalunaarusiortarnissaq maannakkut inatsisini atuuttuni piumasaqaataanngilaq. 1. oktoberimi atuarfiup Ilinniartitaanermut Aqutsisoqarfimmut nalunaarusiarisartagaasa saniatigut aqutsisoqarfiup ingerlatsineq aamma perorsaaneq pillugit atuarfik qanittumik ingerlaavartumillu oqaloqatigiilluartarpaa, taakkulu aqqutigalugit atuarfiup suliaanut paasissutissat nalinginnaasut qulakkeerneqartarput.

3. Ado Lyngep Atuarfia kikkunnut tulluussagaanersoq Naalakkersuisut nassuiaasinnaanerlutik?

**Akissut:** Atuarfiup sullitassai 1982-imili pilersinneqarneranit tassaasimapput meeqqat inuusuttullu eqqarsartaatsimikkut ineriartornermikkut piginnaasakitsut 14-init 20-nut ukiullit.

- a. Kina atuarfimmut innersuussisinnaava?

**Akissut:** Maannakkut suleriaatsimi atuarfimi immikkut atuartitsinermi siunnersortip innersuussinissaq pillugu suliaq aallarnertarpaa. Tulliuttarporlu MISI/PPR-ip ilanngunneqarnissaa, taassumalu kingunerisaanik MISI/PPR-ip nammineerluni atuartoq immikkut atuartitsinermik pisariaqartitsisoq Ado Lyngep Atuarfianut innersuuttarpaa.

- b. Innersuussisarnermut naliliisartunullu nalunaarsuuteqaruni suuppat?

**Akissut:** Atuartut eqqarsaatsimikkut ineriartornermikkut piginnaasakitsut nangitsilluni angerlarsimaffik qimallugu atuartinneqarnerannut/sungiusartinnerannut iluaqutaasussaasorineqaraangat Ado Lyngep Atuarfiani atuartunngortinneqarsinnaapput.

- c. Meeqqat kikkoqqissaat atuarfimmut tulluunnerannut kikkut aaliangiisartuuppat?

**Akissut:** Inissiiniartartussatut ataatsimiititaliamik atuarfik pilersitsisarpoq, tassaniillutillu pisortat, ilinniartitsisut aamma perorsaasut aallartitaat.

- d. Meeqqat ADHD-mik sakkortuumik atugallit atuarfimmut tulluunnersut Naalakkersuisut nassuiarsinnaanerluniku?

**Akissut:** Tunngaviusutigut atuartut eqqarsartaatsimikkut ineriartormikkut piginnaasakitsut ADHD-mik innarluuteqartut imaluunniit aamma suli allanik innarluutininik suussusersivigineqarsimasut atuarfimmi atuartunngortinneqarsinnaapput. Ulluinnarnili atuartut eqqarsartaatsimikkut ineriartormikkut piginnaasakitsut suli allanik innarluutininik suussusersivigineqarsimasunik ataatsimoortitsinissaq ajornakusoorsinnaavoq, soorlu ADHD-mik annertuumik eqqugaasimasunik, taakkumi perorsaasunik sulisunik allanik pisariaqartitsissammata sulissunneqartussanik atuartitsinermik, sungiusaanermik aamma isumaginninnermik immikkut ilisimasalinnik.

4. Meeqqat atuarfik qimakkaangamikku inuiaqatigiinnullu misiliutitut nammineersinneqaleraangata suliniutit suut ingerlanneqartarpat?

**Akissut:** Atuartup atuarfik qimattussanngoraangagu Ado Lyngep Atuarfia atuartumut suliamik ingerlatsisoq peqatigalugu atuartumut iliuusissanut pilersaarusiortarpoq.

Meeqqanut, Inuusuttunut Ilaqutariinnullu Naalakkersuisoqarfiup ataani iliuusissanut pilersaarusiortarpoq pillugu piunasaqaatit pillugit akissummut itisiliivoq:

”Kommuni najugarisaq inunntut innarluutilinnut iliuusissanut pilersaarusiornissamut pisussaaffeqarpoq, tak. inuit innarluutillit tapersersorneqarnissaannut Inatsisartut inatsisaat (innarluutillit taperserneqarnissaannut inatsit) nr. 13, 12. juni 2019-imeersumi § 26. Iliuusissanut pilersaarut soorlu suliarineqassapput meeraq innarluutilik atuartunngulerpat imaluunniit atuartitaanera naammassilerpat imaluunniit meeqqap innarluutillip 18-inik ukioqalinnginnerani. Iliuusissanut pilersaarummi allaatigineqassapput:

- 1) Siunertaq aamma tapersiineri anguniagaq.
- 2) Anguniagaq imaluunniit anguniakkat anguneqarnissaannut tapersiineq suna pisariaqarneris.
- 3) Tapersiinerup sivirusissisaatut naatsorsuutigineqartoq.
- 4) Tapersiinerup malinnaavigineqarnissaa, matumuuna malitseqartitsineq qaqugukkat pisassanersoq ilanngullugu.
- 5) Inatsisartut inatsisaat manna malillugu aamma inatsisit allat malillugit tapersiinerit allat ataqatigiinnerat.
- 6) Ilaquttat attaveqarfiillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikiuutaasut il.il. pillugit pissutsit immikkut ittut allat.”

a. Suliniutinut taakkununga nalilersuisoqartarnerluni? i. Angusassatut nalunaarsuutininik allattorsimaffeqarpa?

**Akissut:** Meeqqanut, Inuusuttunut Ilaqutariinnullu Naalakkersuisoqarfik apeqqummut imatut akissuteqarpoq:

”Tak. qulaani taaneqartut, tassani piunasaqaatigineqarpoq kommunip iliuusissanut pilersaarummi tapersiissutigineqartunut siunertat anguniakkallu allaatigisassagai kiisalu allaaserisassagai qanoq qaqugulu tapersiissutigineqartut malitseqartillugit ingerlateqqinneqassanersut.

Innarluutillit taperserneqarnissaannut inatsisip siunertai (tak. § 1) naapertorlugit nassuiaanissamik kommuni pisussaaffeqarpoq, tassaallutik:

- 1) innarluuteqarnerup malitsigisaanik ajornartorsiutit pillugit inuit innarluutillit siunnersorneqarnissamik taperserneqarnissamillu neqeroorfigineqarnissaannik qulakkeerinniffigineqarnissaat,
  - 2) inuup imminut ikiorsinnaanissaanik siuarsaaneq imaluunniit ulluinnarni inuuneranik oqilisaassineq kiisalu inuunerinnerulersitsineq,
  - 3) inuup innarluutillip ineriartorsinnaanissaanik aamma piginnaasai naapertorlugit nammineq periarfissaqarfiinik atorluaasinnaanernik siuarsaaneq, matumani inummut ataasiakkaamut tamanna periarfissaappat, ilinniagaqarnermik periarfissaq ilanngullugu,
  - 4) inuit innarluutillit inuiaqatigiinni naligiimmik periarfissaqarnissaasa aammalu innarluuteqarneq pissutigalugu assigiinngisitsinerup akerlilerneqarnissaa tamatumuunalu sapinngisamik inuiaqatigiinni tamakkiisumik sunniuteqarluartumillu peqataanissaasa akuunissaasalu qulakkeerneqarnissaa, aamma
  - 5) ataasiakkaat ilinniarnissaannut sulisinnaanissaannullu periarfissat siuarsarnissaat.”
- b. Inuusuttut siunissami inuiaqatigiinni inooqataalernissaannut kikkut akisussaasutut inissinneqartarpat?

**Akissut:** Meeqqanut, Inuusuttunut Ilaqutariinnullu Naalakkersuisoqarfik apeqqummut imatut akissuteqarpoq: ”Inuit innarluutillit taperserneqarnissaannut Kommunalbestyrelse akisussaaffeqarpoq, tak. qulaani allassimasut. Immikkut pingaaruteqarpoq Innarluutillit taperserneqarnissaannut inatsisip siunertaanik (nr. 4) erseqqissaanissaq: “[Innarluutillit taperserneqarnissaannut inatsisip siunertaraa] inuit innarluutillit inuiaqatigiinni naligiimmik periarfissaqarnissaasa aammalu innarluuteqarneq pissutigalugu assigiinngisitsinerup akerlilerneqarnissaa tamatumuunalu sapinngisamik inuiaqatigiinni tamakkiisumik sunniuteqarluartumillu peqataanissaasa akuunissaasalu qulakkeerneqarnissaa”.

5. Meeqqat/inuusuttut maannakkut Ado Lyngø Atuarfiani atuartut kikkuppat, ukiui aammalu suut nappaatit suussusersineqarsimaneri agguataarneqarneri aallaavigalugit?

**Akissut:** Maannakkut atuartut 15-inik 20-nut ukioqartut 13-iupput, taakkulu assigiinngitsunik eqqarsartaatsimikkut ineriartormikkut akornuteqarput. Innarluutit suussusiinik immikkoortitsilluni saqqummiisoqarsinnaanngilaq taakkumi inunntu ataasiakkaanut tunngassuteqarmata.

6. Ilinniarsimasut sorliit maannakkut atorfeqarpat?

**Akissut:** Atuarfimmi ilinniartitsisutut ilinniagaqarsimasut 6-iupput, perorsaasutut ilinniagaqarsimasut 3-upput, perorsaanermi ikiortit 7-iupput, pedeli ilinniarsimasoq ataaseq aamma eqqiaasoq ataaseq.

- a. Sulisuni taakkunani qassit ilinniarsimasuuppat?

**Akissut:** Ilinniagaqarsimasut 10-t atuarfimmi atorfeqarput.

b. Qaammammut ilinniarsimangitsunik sulisoqartarneq tiimit qassiuppat?

**Akissut:** Ilinniarsimangitsunut sulisunut 1120 tiimit missaannik qaammammut atuisoqartarpoq.

7. Qanga kingullermi atuarfimmi nakkutilliiartortoqarpa?

**Akissut:** Ulloq unnuarlu suliffeqarfittut Naalackersuisut "ileqquusumik" aaqjissuussamik Ado Lyngep Atuarfianik nakkutillineq ajorput. Akerlianilli Ilinniartitaanermut Aqutsisoqarfik Ilinniartitaanermut Naalackersuisoqarfiup ataaniittup ingerlatsineq minnerunngitsumillu isumaginninneq perorsaanerlu pillugit atuarfik qanittumik ingerlaavartumillu oqaloqatigilluartarparaa. Taamaalilluni akulikitsumik oqaloqatigiinnermillu tunngaveqartumik aamma atuarfimmi pisortanik sulisunillu ilisimasatigut perorsaanikkullu siunnersuinikkut ilitsersuinikkullu Ilinniartitaanermut Aqutsisoqarfik ingerlataqarpoq.

a. Nakkutilliiartornermi suut ilisimatitsissutigineqarpat?

**Akissut:** Oqaloqatigiinnermik tunngaveqarluni nakkutilliiinnermi matumani ajornartorsiutinik saqqummersoqaraangat aaqqinniartortoqartarpoq.

8. Ukiut qulit kingulliit qasseriaq nakkutilliiartortoqarsimava?

**Akissut:** Apeqqut 7-imut akissut takuuk.

a. Ukiuni qulini kingullerni nakkutilliiartortoqartarsimaneranit ilisimatitsissutit suut piusarsimappat?

**Akissut:** Apeqqut 7.a-mut akissut takuuk.

9. Naalackersuisut pineqartumut allanik paasisutissiisinnaanerlutik?

**Akissut:** Suliffeqarfiup sammisassai aamma sullitassai allanngortinniaaraanni annertusarniaraanniluunniit amerlasuut isumaliutigineqaqqaartariaqartut Naalackersuisut isumaqarput. Soorlu innarluuteqartut immikkoortut assigiinngitsut atuarfimmuut ataatsimut atuartut immikkoortut pisariaqartitaat aamma tunngavigisaat, katitigaanerat, perorsarneqarnissaat, avatangiisitigut sinaakutissaat, sulisut piginnaasaat, immikkut paasisimasalinnut attaveqarsinnaanerat il.il. eqqarsaatigeqqaarnagit katersuinnaarneqarsinnaanngillat. Taakku saniatigut innarluutillit aalajangersimasut pisariaqartitaat ilisimasariaqarput, soorlu amerlassusaat/siammarsimanerat, ukioqatigiit amerlassusaat minnerunngitsumillu inuit ataasiakkaat imaluunniit innarluutillit immikkoortut illoqarfimmuut allamut, ilaqquttatik ikinngutitillu kiisalu inuunermi sungiusimasatik avatangiisitillu qimallugit perorsaanikkut isumaginninnikkullu taamaaliussalluni pisariaqarnersoq.

Inussiarnersumik inuulluaqqusillunga

  
Peter Olsen